



SURUHANJAYA PILIHAN RAYA MALAYSIA

KENYATAAN MEDIA

BIL. 18 / 2020

URUSAN PILIHAN RAYA KECIL (PRK) DEWAN UNDANGAN NEGERI (DUN) N.23 CHINI, PAHANG

1. Suruhanjaya Pilihan Raya (SPR) telah menerima pemakluman rasmi daripada Yang di-Pertua Speaker Dewan Undangan Negeri (DUN) Pahang, YB Datuk Seri Haji Ishak bin Haji Muhamad pada 8 Mei 2020, berhubung dengan kekosongan luar jangka kerusi DUN N.23 Chini, Pahang berikutan kembalinya ke rahmatullah penyandangannya Allahyarham YB Dato' Sri Abu Bakar bin Haji Harun pada hari Rabu, 6 Mei 2020.
2. Sehubungan dengan itu, SPR telah mengadakan Mesyuarat Khas pada hari ini dan menetapkan bahawa satu Pilihan Raya Kecil (PRK) perlu diadakan dalam tempoh 60 hari dari tarikh kekosongan yang dipastikan oleh SPR mulai pada 8 Mei 2020 bagi mengisi kekosongan di kerusi DUN berkenaan.

3. Bagi maksud melaksanakan PRK DUN N.23 Chini, Pahang ini, SPR telah mengadakan perbincangan dengan Majlis Keselamatan Negara (MKN), Agensi Pengurusan Bencana Negara (NADMA), Kementerian Kesihatan Malaysia (KKM) dan Polis Diraja Malaysia (PDRM) berhubung *Standard Operating Procedure* (SOP) khas pelaksanaan urusan pilihan raya dalam tempoh Perintah Kawalan Pergerakan Bersyarat (PKPB) yang sedang berkuat kuasa ini. SPR akan memastikan setiap proses dalam urusan pilihan raya tersebut selari dengan langkah-langkah kawalan penyebaran wabak Covid-19 sebagaimana yang dinasihatkan oleh KKM.

4. Pada masa kini, SOP tersebut sedang diteliti oleh pihak KKM dan seterusnya akan dimuktamadkan bagi tujuan pemakaiannya pada PRK kali ini. Di antara langkah kawalan yang dicadangkan oleh SPR ialah mengehadkan jumlah maksimum hanya 400 orang daripada 600 orang pemilih sebelum ini bagi setiap satu saluran. Selain itu, SPR juga akan menambah maklumat tambahan baharu dalam *voter's card* (VC) yang dihantar kepada pengundi iaitu "MASA KELUAR MENGUNDI YANG DIGALAKKAN". Pengundi adalah digalakkan untuk keluar mengundi dalam tempoh waktu tersebut untuk pematuhan penjarakan sosial dan mengurangkan kesesakan di pusat mengundi serta saluran mengundi. Maklumat "MASA KELUAR MENGUNDI YANG DIGALAKKAN" ini juga akan dipaparkan dalam portal SPR.

5. Berhubung urusan kempen pilihan raya, SPR akan memastikan sebarang bentuk aktiviti kempen yang boleh dilaksanakan adalah selari dengan arahan Kerajaan yang berkuat kuasa pada waktu yang berkenaan dalam usaha mengawal penularan wabak Covid-19.

6. Bagi maksud menjalankan PRK ini, SPR telah menetapkan tarikh-tarikh penting seperti yang berikut :

Hari Penamaan Calon : **20 Jun 2020 (Sabtu)**
Hari Mengundi Awal : **30 Jun 2020 (Selasa)**
Hari Mengundi : **4 Julai 2020 (Sabtu)**

7. Tempoh berkempen yang ditetapkan adalah 14 hari bermula selepas pengisytiharan calon-calon yang bertanding sehingga pukul **11.59 malam, 3 Julai 2020 (Jumaat)**.

8. Bagi urusan permohonan undi pos luar negara dan dalam negara, tarikh buka dan tarikh tutup permohonan adalah seperti berikut :

Tarikh Buka : **15 Mei 2020 (Jumaat)**
Tarikh Tutup : **18 Jun 2020 (Khamis)**

9. Bagi proses Pilihan Raya Kecil ini, **Pegawai Daerah Pekan, YH Dato' Zaliza bin Zulkipli** dilantik sebagai **Pegawai Pengurus Pilihan Raya Kecil DUN N.23 Chini**. Beliau akan dibantu oleh Empat (4) orang Penolong Pegawai Pengurus.

10. SPR juga bersetuju menubuhkan **TIGA (3) Pasukan Penguat Kuasa Kempen Pilihan Raya (PP-KPR)** untuk memantau semua aktiviti kempen pilihan raya sepanjang tempoh rasmi berkempen. Pasukan PP-KPR ini akan dianggotai oleh wakil-wakil daripada pihak Polis, Pihak Berkuasa Tempatan (PBT) dan wakil-wakil calon yang bertanding.

11. SPR akan menggunakan **Dewan Utama Institut Kemahiran Belia Negara (IKBN) Pekan** sebagai **Pusat Penamaan Calon dan Pusat Penjumlahan Rasmi Undi.**

12. Untuk memudahkan proses penamaan calon, SPR menyeru kepada bakal-bakal calon yang ingin bertanding dalam PRK N.23 Chini agar mengisi dan membuat semakan awal pengisian borang tersebut dengan Pejabat Pegawai Pengurus atau Pejabat Pilihan Raya Negeri Pahang sebelum Hari Penamaan Calon. Selain itu bakal-bakal calon juga adalah dicadang untuk membuat pembayaran deposit secara atas talian lebih awal. Ini adalah bertujuan untuk memastikan semua proses penamaan calon dapat diselesaikan lebih awal dan berjalan lancar.

13. Walau bagaimanapun, adalah diingatkan bahawa Kertas Penamaan Calon yang telah lengkap diisi dan disemak oleh Pejabat Pegawai Pengurus itu hendaklah dikemukakan oleh Calon atau penyokong atau pencadangnya semasa Hari Penamaan Calon di Pusat Penamaan Calon yang telah ditetapkan oleh SPR.

14. Bagi peraturan berkempen, SPR akan berpandukan Garis Panduan (SOP) dan peraturan yang dikuatkuasakan untuk sepanjang tempoh Perintah Kawalan Pergerakan (PKP) atau Perintah Kawalan Pergerakan Bersyarat (PKPB) atau Perintah Kawalan Pergerakan Diperketatkan (PKPD).
15. SPR akan meneruskan penyiaran secara langsung proses-proses pilihan raya menerusi *FB Live* di laman *Facebook* SPR sebagaimana yang dilaksanakan pada PRK sebelum ini. SPR juga akan menyiarkan kepada umum keputusan tidak rasmi PRK yang tertakluk kepada pengesahan melalui laman media sosial SPR, portal SPR dan juga paparan skrin di Pusat Penjumlahan Rasmi Undi.
16. Seramai **832 orang petugas** akan dilantik bagi mengendalikan proses PRK N.23 Chini. Manakala sebanyak **14 buah Pusat Mengundi** yang mengandungi kesemuanya **66 saluran** akan digunakan untuk kemudahan mengundi. PRK ini dianggarkan memerlukan peruntukan sebanyak **RM4.3 juta**.
17. **Daftar Pemilih Pilihan Raya** yang akan digunakan untuk PRK ini adalah Daftar Pemilih Induk **2019** yang **dikemaskini sehingga 7 Mei 2020**. Daftar Pemilih tersebut mengandungi **20,990 orang pengundi** yang terdiri daripada 20,972 orang pengundi biasa, 18 orang pengundi awal polis. Daftar Pemilih tersebut akan mula dijual pada **3 Jun 2020**.

18. Seperti yang telah dijelaskan, SPR akan turut menghantar **Kad Pengundi (Voter's Card)** kepada semua pengundi di Chini. *Voter's Card* ini mengandungi maklumat Pusat Mengundi, Saluran Mengundi, Nombor Bilangan Pengundi, Tarikh, Masa Pengundian dan Cadangan Masa Keluar Mengundi yang digalakkan. Ia akan memudahkan pengundi untuk mengetahui maklumat pengundian mereka dan melancarkan lagi proses pada hari mengundi serta membantu dalam pematuhan penjarakan sosial di pusat-pusat mengundi.

19. Mulai tarikh **3 Jun 2020 (Rabu)**, para pengundi boleh membuat **semakan Daftar Pemilih** untuk mengetahui maklumat pusat mengundi, saluran mengundi dan nombor bilangan mereka melalui laman portal SPR (**www.spr.gov.my**) atau menelefon ke talian **03-88927018** atau melalui **SMS 15888** atau melalui aplikasi **MySPR Semak**.

20. Bagi menggalakkan pengundi supaya keluar menunaikan tanggungjawab mereka pada hari mengundi, SPR akan melaksanakan kempen **`Jom Kita Undi`** melalui pelbagai saluran media termasuk di media elektronik, media sosial, media cetak, hebahan melalui siar raya dan pemasangan kain rentang di lokasi-lokasi strategik seperti di tempat-tempat tumpuan awam, hentian bas dan lain-lain tempat yang bersesuaian.

21. SPR mensasarkan **70 peratus pengundi** akan keluar mengundi. SPR juga memohon kerjasama semua pihak termasuk pihak media dan parti-parti politik agar turut mengambil langkah untuk menyeru dan menggalakkan pengundi supaya keluar mengundi.
22. SPR juga akan meneruskan penambahbaikan seperti berikut:
- a. Menyediakan saluran khusus bagi pengundi yang berumur 60 tahun dan ke atas di setiap Pusat Mengundi;
 - b. Memanjangkan tempoh masa pengundian selama 30 minit dari jam 8.00 pagi hingga 5.30 petang berbanding sehingga jam 5.00 petang pada PRU-14;
 - c. Sebanyak 20 saluran baharu ditambah bagi mengelakkan jumlah pengundi terlalu ramai di satu-satu saluran menjadikan keseluruhannya adalah 66 saluran berbanding 46 saluran pada PRU-14; DAN
 - d. Pengundi-pengundi Orang Kurang Upaya (OKU) akan mengundi di Saluran 1. Pada PRK ini seramai 289 orang pengundi OKU telah dikenal pasti dan mereka adalah berdaftar dengan Jabatan Kebajikan Masyarakat (JKM).
23. Maklumat-maklumat lain berhubung dengan pilihan raya kecil ini, terutamanya mengenai SOP khas perjalanan pilihan raya yang mengambilkira pandemik Covid-19 akan dimaklumkan dari semasa ke semasa oleh SPR.

Sekian dan terima kasih.



DATUK AZHAR AZIZAN HARUN

Pengerusi

Suruhanjaya Pilihan Raya Malaysia (SPR)

Tarikh : 15 Mei 2020 / 22 Ramadan 1441H